

«19» նոյեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով մաքսային ձևակերպումների մասնագետ Վազգեն Գարեգինի ճանճապանյանի վերաբերյալ նյութերը.

Պ Ա Ր Զ Ե Ց Ի՝

ՀՀ ՊԵԿ հետքացթողումային հսկողության վարչության աշխատակիցները իրականացրել են արտագնա մաքսային ստուգում «Աբոումիթ» ՍՊ ընկերությունում և հայտնաբերել, որ «Աբոումիթ» ՍՊ ընկերության անվամբ 05100010/271118/0077956, 05100010/211218/0086762, 05100010/211218/0086783 ապրանքների հայտարարագրերով ԵԱՏՄ ԱՏԳ ԱԱ 0202 30 900 6 ծածկագրով հայտարարագրված «Տավարի սառեցված միս ոսկրահանված՝ բարձրորակ» նկարագրությամբ ապրանքը հայտարարագրվել է ծածկագրի վերաբերյալ ոչ ճշգրիտ տեղեկություններով:

16.07.2012թ. թիվ 54 որոշման Եվրասիական տնտեսական միության արտաքին տնտեսական գործունեության 12-րդ ծանոթագրության համաձայն՝ ապրանքները դասակարգվում են ԵԱՏՄ ԱՏԳ ԱԱ վերոնշյալ ծածկագրին՝ Եվրասիական տնտեսական միության անդամ պետության կառավարության կողմից լիազորված մարմնի կողմից տվյալ ապրանքները, որպես տավարի բարձրորակ միս դասվելու պարագայում: Ապրանքները որպես այդպիսին դասվելու կարգը սահմանվում է Եվրասիական տնտեսական հանձնաժողովի կողմից:

Արտագնա մաքսային ստուգման ժամանակ կատարված ուսումնասիրության ընթացքում ընկերության 25.08.2021 թվականին ներկայացրած հայտարարությունից պարզվել է, որ վերը նշված հայտարարագրումները տեղի են ունեցել արտահանող երկրի՝ մատակարար կազմակերպության կողմից տրված համապատասխան հաշիվ-ապրանքագրերի և պետական լիազոր մարմինների կողմից տրված հավաստագրերին ու տեղեկանքներին համապատասխան, որտեղ նշված ապրանքատեսակը նկարագրված է «Տավարի սառեցված միս ոսկրահանված՝ բարձրորակ»: ՀՀ կառավարության կողմից լիազոր մարմնի՝ Սննդի Անվտանգության Պետական Ծառայության, կողմից կատարվել է նմուշառում և փորձաքննություն, որի արդյունքում տրվել է հավաստագիր, որում նշված ապրանքատեսակը նկարագրված է «Տավարի սառեցված միս ոսկրահանված՝ բարձրորակ»:

ՀՀ ՊԵԿ մաքսային հսկողության վարչության «Ապրանքի ոչ ճիշտ դասակարգում հայտնաբերելու դեպքում ապրանքի դասակարգման վերաբերյալ» 16.09.2021թ. թիվ ԱԴՈ-21-000080 որոշման համաձայն՝ «Տավարի սառեցված միս ոսկրահանված՝ բարձրորակ» ապրանքը ԵԱՏՄ ԱՏԳ ԱԱ 0202 30 900 6 ծածկագրով դասակարգելու համար անհրաժեշտ է լիազոր մարմնի կողմից տրված հաստատող փաստաթուղթ, որի տրամադրման կարգը հայտարարագրման պահին և առ այսօր հաստատված չէ, հետևաբար, առաջնորդվելով ԱՏԳ ԱԱ մեկնաբանման հիմնական 1-ին և 6-րդ կանոններով, նշված ապրանքատեսակը դասակարգվում է ԵԱՏՄ ԱՏԳ ԱԱ 0202 30 900 8 ծածկագրով:

Իրականացված արտագնա մաքսային ստուգման արդյունքում 29.09.2021թ. կազմվել է թիվ 0065-Ա ստուգման ակտը և «Աբոումիթ» ՍՊ ընկերությանն առաջարկվել է կատարել վերահայտարարագրում ԵԱՏՄ ԱՏԳ ԱԱ ճշգրիտ ծածկագրերին համապատասխան՝ վճարելով պակաս վճարված մաքսային վճարները: Արտագնա մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար:

Նյութերի ուսումնասիրման արդյունքում պարզվել է, որ 05100010/271118/0077956, 05100010/211218/0086762, 051000010/211218/0086783 ապրանքների հայտարարագրերը ներկայացրել է Վազգեն Գարեգինի Ճանճապանյանը: 2021 թվականի հոկտեմբերի 7-ին ապրանքի ծածկագրի վերաբերյալ ոչ ճշգրիտ տեղեկություններ ներկայացնելու փաստի կապակցությամբ ՀՀ ՊԵԿ իրավաբանական վարչությունում Վազգեն Գարեգինի Ճանճապանյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

Վարչական վարույթի ընթացքում Վազգեն Ճանճապանյանը բացատրություն է տվել այն մասին, որ «Աբոուիթ» ՍՊ ընկերության անվամբ թիվ 05100010/271118/0077956, 05100010/211218/0086762, 051000010/211218/0086783 ապրանքների հայտարարագրերով ԵՏՄ ԱՏԳ ԱԱ 0202 30 900 6 ծածկագրով հայտարարագրել է «Տավարի սառեցված և ոսկրահանված միս՝ բարձրորակ» նկարագրությամբ ապրանքը և առաջնորդվել է Ոսկրահանայի Հանրապետությունից ստացված փաստաթղթերի մեջ արտացոլված նկարագրով և տեղեկատվությամբ՝ հաշիվ-ապրանքագիր, անասնաբուժական սերտիֆիկատ, արտահանման հայտարարագիր, որոնց մեջ նշված է եղել «Տավարի միս բարձրորակ՝ սառեցված, ոսկրահանված»: Ծածկագրի ընտրման ժամանակ ավտոմատ համակարգը որևէ թույլտվություն չի պայանջել:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է: Սույն հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է անվանումը, նկարագրությունը, որն անհրաժեշտ է այն մաքսային վճարների, հատուկ, հակազնազցման, փոխհատուցման տուրքերի և այլ վճարների հաշվարկման և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 20-րդ հոդվածի 1-ին և 4-րդ մասերի համաձայն՝ հայտարարատուն և այլ անձինք ապրանքների դասակարգումն իրականացնում են ԱՏԳ ԱԱ-ին համապատասխան՝ մաքսային հայտարարագրման ժամանակ և այն դեպքերում, երբ մաքսային կարգավորման ոլորտի

միջազգային պայմանագրերի ու ակտերի համաձայն, մաքսային մարմին են հայտնում ապրանքի ծածկագիրը՝ Արտաքին տնտեսական գործունեության ապրանքային անվանացանկին համապատասխան: Առևտրային, տրանսպորտային (փոխադրման) և (կամ) այլ փաստաթղթերում, ինչպես նաև եզրակացություններում, տեղեկանքներում, փորձագիտական հիմնարկների կողմից տրվող փորձաքննության արձանագրություններում նշված ապրանքների ծածկագրերը պարտադիր չեն ապրանքների դասակարգման համար: Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ունի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: 2-րդ մասի համաձայն՝ իր գործունեությունն իրականացնելիս մաքսային ներկայացուցիչն իրավունք ունի իր կողմից ներկայացվող անձից պահանջելու մաքսային գործառնությունների իրականացման համար անհրաժեշտ, այդ թվում՝ առևտրային, բանկային և օրենքով պահպանվող այլ գաղտնիք կազմող տեղեկատվություն կամ այլ գաղտնի տեղեկատվություն պարունակող փաստաթղթեր և տեղեկություններ, և այդ փաստաթղթերն ու տեղեկություններն ստանալու այնպիսի ժամկետներում, որոնցով ապահովվում է սույն Օրենսգրքով սահմանված պահանջների կատարումը: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ: «Մաքսային կարգավորման մասին» ՀՀ օրենքի 27-րդ հոդվածի 2-րդ մասի համաձայն՝ մաքսային ներկայացուցչի և հայտարարատուի կամ նրա լիազորած անձի միջև հարաբերությունները կարգավորվում են նրանց միջև կնքված պայմանագրերով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 1-ին պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

Մաքսային կանոնների խախտումների վերաբերյալ վարույթի շրջանակում հաստատվել է այն հանգամանքը, որ Վազգեն Գարեգինի Ճանճապանյանին տրամադրվել են անհրաժեշտ փաստաթղթերը, որոնցում նշված է եղել տեղեկատվություն ապրանքի նկարագրության և բնութագրական հատկանիշի վերաբերյալ, մինչդեռ վերջինս նշված ապրանքի համար ընտրել է ոչ ճիշտ ծածկագիր, ինչպես նաև վերջինս որպես մաքսային ձևակերպումների մասնագետ կարող էր ընկերության տրամադրած փաստաթղթերի ուսումնասիրությունից պարզել ապրանքի նկարագրությունը, նպատակային նշանակությունը, տիրապետեր իրավական ակտերին և պետք է միջոցներ ձեռնարկեր համապատասխան ծածկագրով դասակարգելու համար:

Վազգեն Գարեգինի Ճանճապանյանը 2021 թվականի նոյեմբերի 19-ին հրավիրվել է ՀՀ ՊԵԿ իրավաբանական վարչություն՝ իրենց նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ «Աբոտմիթ» ՍՊ ընկերության անվամբ 05100010/271118/0077956, 05100010/211218/0086762, 05100010/211218/0086783 ապրանքների հայտարարագրերով ՀՀ տարածք ներմուծված և փաստացի ԵԱՏՄ ԱՏԳ ԱԱ 0202 30 900 8 ծածկագրով հայտարարագրման ենթակա «Տավարի սառեցված միս ոսկրահանված՝ բարձրորակ» նկարագրությամբ ապրանքը մաքսային ձևակերպումների մասնագետ Վազգեն Գարեգինի Ճանճապանյանը հայտարարագրել է ոչ ճշգրիտ ծածկագրով, որի հետևանքով պակաս հաշվարկված մաքսային վճարներ չեն առաջանում, այսինքն՝ Վ. Ճանճապանյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ նախատեսված մաքսային կանոնների խախտում, ինչը հիմնավորվում է ՀՀ ՊԵԿ մաքսային հսկողության վարչության 16.09.2021թ. «Ապրանքի ոչ ճիշտ դասակարգում հայտնաբերվելու դեպքում ապրանքի դասակարգման վերաբերյալ» թիվ ԱԴՈ-21-000080 որոշմամբ, 29.09.2021թ. թիվ 0065-Ա ստուգման ակտով, 05100010/271118/0077956, 05100010/211218/0086762, 05100010/211218/0086783 Ա/Հ-ներով, ԵՏՀ 16.07.2012թ. թիվ 54 որոշմամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Վազգեն Գարեգինի Ճանճապանյանին (անձնագրի տվյալներ՝ AS028583) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ և նրան տուգանել 50000 ՀՀ դրամ: /900005024055 (կող-19) հաշվեհամարին/

2. Որոշման մասին հայտնել Վ. Ճանճապանյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ

ՎԱՐՉՈՒԹՅԱՆ ՊԵՏ՝



Ա. ՄՆԱՑԱԿԱՆՅԱՆ